

‘BEHI EROAK’. Euskal Herriko nekazari talde batek ere parte hartu zuen atzo egindako mobilizazioetan

Ekoizpen eredua aldatzeko eskatu dute abeltzainek Bruselan

Nekazari ministroek han egin zuten bileraren harian egin ziren protestak

I. Petxarroman | DONOSTIA

Ehunka abeltzain eta laborarik –3.000 bat, antolatzaileen arabera– Europako nekazaritza politika «errotik» aldatzeko eskatu zuten atzo Bruselan egindako mobilizazioetan. Mobilizazioak Europako Batasuneko Nekazaritza ministroek arratsaldean egin zuten bileraren harian antolatu zituzten, eta, Euskal Herriatik abiatutako talde batek ere parte hartu zuen haietan.

Haien artean, EHNEko Bizkaiko lehendakari Unzalu Salterain izan zen. EGUNKARIArekin mintzatu zen arratsaldean, hain justu ere, Europako Nekazari Elikagai Industrien Elkarteko bulegoa okupatzeko egin zuten ekintzaren ondoren. «Hain zuzen salatu nahi dugu krisi honen eta Europan dagoen nekazaritza politikaren ondorioz jende asko aberasten ari dela. Aldi berean, eskatu nahi dugu pentsu-txeak zorrotz kontrolatzeko».

Salterainek oso balorazio baikorra egin zuen atzo kalean izan ziren mobilizazioen inguruan. «Eztabaidak eztanda egin du

kalean. Funtsean, adierazi nahi izan dugu sakoneko arazoari heldu behar diotela ministroek, eta ez bakarrik salmenten behe-rakadari».

Eta mezu hori eman zioten abeltzainen ordezkariak –tarte-an Paul Nicholson EHNEko kidea– Europako Parlamentuko Nekazaritza Batzordeari atzo. «Nekazaritza politika errotik aldatzeko eskatu diegu. Azken batean, ekoizpen eskubideak banatu egin behar dira kontrol sistema baten bidez, horrela, ustiagune txikiak babestu eta ahalik eta lanpostu gehien izatea ahalbitzeko», esan zion Salterainek kazeta honi.

Gaur Nekazaritza Ministroen Kontseiluko lehendakariarekin bilduko dira eta datozen egunotan, berriz, Europako Batasuneko Nekazaritza komisarioarekin.

Bestalde, 15 herrialdeetako ministroek egin zuten bilera aztertzeke nola aurre egin okelaren merkatuak izan duen behe-rakadari. Bilerak gaur segituko du. Herrialdeen artean ikuspegi diferenteak daudela agerian geratu zen atzo.



BOB EDMÉ

FDSEAKo laborariak, atzo, Biriatuan, kamioiak kontrolatzen.

Okela kontrolatzen

EKINTZA BIRIATUN. Laborari sindikatuak hegoaldetik iparralderantz zihoazen kamioiak kontrolatu ditu

FDSEA sindikatuko hogeita hamar bat laborarik beren gisan kontrolatu zituzten, atzo goizean Biriaturako pagalekuan, Espainiatik Frantziara edo Ingalaterrara zihoazen kamioi frigorifikoak. 9:00etarako emana zuten ekintzaren abisua, frantses estatuko bertze muga batzuetan bezala. Oren bat eta erdi joan ziren eguzkipe hotz hartan, laborarien kontrolak hasi baino lehen. Noizbait lotu ziren lanari eta kamioiak pagalekura hurbiltzen zirelarik geldiarazten zituzten.

FDSEAKo kideek pixka bat galduak zirela ziruditen. Nahiko molde nahasian eta asal-datuan geldiarazten zituzten hozkailudun kamioiak, edo batzuk ohar gabeen pasatzen uzten. Ea nolako haragia garraiatzen zuten jakin nahi zuten, zer prezioetan saldua zen eta kontrolak behar bezala eginak ote ziren. Kamioi gidariak garraiatzen zutenaren agiria erakustea galdetzen zieten eta hozkailua idekarazten. FDSEAKoek ez zuten zorte handirik izan, ia aldi guziz laranja edo bertze fruitu batzuk

baitziren kamioietan. Bertze zenbait kasutan kamioia husta zela ohartzen ziren. Behin baizik ez zuten aurkitu behikia eta zerriak zekartzen kamioi bat. Bainan zakur eta katu bazkarentzat omen zen.

FDSEaren kontrola istilurik gabe gertatu zen. Kamioi-lariak arazo gehiegi sortu gabe sartu ziren jokoan. Ez zuten kezkatzeko arrazoirik, fruituak garraiatzen baitzituzten. Ondean ziren jendarmek ez zieten kasurik egin trafikoa doi bat nahasten zuten egun bateko kontrolatzaileei.

EZBEHARRAK. Larunbatean gertatu ziren suteak, baserri eta etxe batean

Adineko bi pertsona hil dira Azkoienetan eta Igorren haien etxeetan izan suteetan erreta

Erredakzioa | DONOSTIA

Haien etxetan izandako suteetan bi adineko pertsona hil dira joan den asteburuan Euskal Herrian. Ezbehar bat Azkoienetan (Nafarroa) jazo zen larunbat gauean. Guardia Zibilak emandako informazioaren arabera, sutea gertatu zen Josefina Zalduendo Aranda 82 urteko azkoiendarra lotan zelarik. Eguerezko berogailu bateko txinparta bat emakumea zegoen oheraino iritsi zen, eta sortu zen suak erreta hil zen. Emakumea-

ren senarrak aurkitu zuen gorpua etxeratu zenean, gaueko 23:30ak aldera. Laster ohartarazi zuen herriko udaltzaingoa gertatutakoaz, eta Guardia Zibilak eta bake epaileak behar zituzten azterketak egin ondoren, gorpua Nafarroako Ospitaleko Ospital Anatomiko Forentsera eraman zuten. Igandean ehortzi zuten Azkoienetan.

Igorren hil bat, baserri bat erreta

Bestalde, larunbat gauean Gervasio Pujana 72 urteko gizonez-

koa hil zen Igorren, Artabe bizi zen baserriak su hartu ondoren.

Sutea gaueko 23:00ak aldera gertatu zen, Artabe auzoan, Ertzaintzak jakinarazi zuenez. Suhiltzaileak sua sortu eta berehala agertu ziren baserrira, inguruko bizilagunek ohartarazitak. Hainbat ordu lanean igaro ondoren, goizaldeko 02:00ak aldera itzali zuten sua.

Baserria guztiz kiskalita geratu zen, eta Gervasio Pujanaren gorpua aurkitzeko saioa goizera arte laga zuten, argitasun eskasia zela-eta. Igande goizean ekin zioten lan horri, eta bederatziak aldera aurkitu zuten Gervasio Pujanaren gorpua. Hala ere, ADN frogak egin behar diote hura dela ziurtatzeko.

MENDIA. J.A.L.L.L. zamudioarra Garmoko mendian izan zuen istripua

Mendizale bat erreskatatu dute zaurituta Pirinioetan

Erredakzioa | DONOSTIA

Atzo arratsaldean, Guardia Zibilaren erreskate taldeek J.A.L.L.L. 34 urteko zamudioarra erreskatatu zuten Garmoko mendian. Mendizalea, mendiko lepotean erori zen, eta hanka bateko tibia eta peronea hautsi zituen, Huescako Gobernu Ordezkaritzak esan zuenez.

Iturri beren arabera, mendizalea Panticosako bainuetxetik abiatu zen mendia egitera, eta elurtegi batean izan zuen istripua. Zaurituta

erreskatzen Guardia Zibilaren taldeekin batera, mediku bat eta UHEL-41 taldeko kideak aritu ziren. Mendizalea Huescako San Jorge ospitalera eraman zuten.

Bestalde, atzo egin zituzten Villabonan Alex Legarra larunbatean Peña Teleran, amildegi batetik jausi ondoren, hil zen mendizalearen aldeko hileta elizkizunak. Mendizalearekin zihoan lagunak azaldu zuenez, Legarrak irrist egin zuen, eta amildegi batetik behera jausi zen.